



Sesida dals

16 d'avrigl 2019

Communitgà ils

18 d'avrigl 2019

Protocol nr.

246

Dumonda Derungs

concernent las consequenzas da l'acceptaziun da l'iniziativa dal pievel cunter
birocrasia e reglamentaziuns nunnecessarias

Resposta da la regenza

Ils ultims onns ha la regenza fatg diever da sia libertad d'agir per evitar e per eliminar ina birocrasia e reglamentaziun nunnecessaria. Las mesiras ch'èn vegnidas prendidas fan effect, e quai betg pir dapi ch'il "artitgel da birocrasia" è vegnì relaschà l'onn 2012. Numerusas regulaziuns ch'èn relevantas per l'economia sa basan però sin la legislaziun federala e na pon betg vegnir influenzadas directamain dal chantun. Quai è vegnì consolidà gia durant la sessiun d'october 2015 en il rom da las debattas davart l'incumbensa Epp concernent la deregulaziun e las distgargias administrativas sco er davart la dumonda Felix concernent l'effect dal "artitgel da birocrasia", art. 84 al. 4 da la constituziun chantunala. En connex cun la dumonda Claus concernent la limitaziun temporara da relaschs (sunset legislation) e l'examinaziun dal dumber da regulaziuns inoltrada durant la sessiun d'october 2016 ha la regenza constatà, ch'il chantun haja prendì differentas mesiras per garantir la durabilitad da l'acziun "EFLAD" ch'è vegnida realisada avant ca. 20 onns: En spezial l'examinaziun preliminar obligatorica da tut ils projects chantunals legislativs areguard l'observaziun dals principis dal EFLAD, il relasch da directives legislativas cun prescripziuns formalas e materialas per ina buna legislaziun e la purschida d'ina scolaziun e furmaziun supplementara giuridica per tut las collavuraturas e tut ils collavuratur che s'occupan da projects legislativs. Vi da quai n'è sa midà nagut. Plinavant vegn realisada per mintga project legislativ ina valitaziun da las consequenzas da la regulaziun (VCR), e la regenza giuditgescha en il rom d'ina examinaziun speziala da la necessitad che vegn fatga al cumenzament da mintga project legislativ, sch'i basegna ina regulaziun. Ultra da quai datti tar l'uffizi per economia e turissem in spurtegl unic per domiciliaziuns ed expansiuns. L'incumbensa Cramerer concernent la simplificaziun e l'acceleraziun da la procedura per la permissiun da construcziun è vegnida exequida en la sessiun d'october 2018 (revisiun da la LPTGR). Cun la digitalisaziun, en spezial cun l'e-government, vegn persequitada vinavant la finamira da simplifitgar e da concentrar las proceduras ed ils contacts cun las autoritads. Sin fundament da sia responsabladad directiva incumbensescha la regenza ultra da quai adina cler e net l'administraziun da far diever activamain da las pussaivladads da la deregulaziun e da la debirocratisaziun.

Tar la dumonda 1: La regenza è fitg conscienta da la tematica. Sco menziunà vengnan prendidas mesiras, sche la libertad d'agir è avant maun. Er ils uffizis sa stentan d'agir e d'operar en moda nunbirocratica. L'index da libertad dad Avenir Suisse è dal rest adattà mo limitadamain sco indicatur per questa tematica. 10 da 17 indicaturs economics mesiran valurs directivas da la politica fiscala e finanziaria che la regenza na po betg influenzar directamain. Ultra da quai sa preschenta noss chantun fitg bain tar blers indicaturs ch'èn relevants per la regulaziun, p.ex. tar la regulaziun dal margà da lavur, tar la durada fitg curta da la procedura per la permissiun da construcziun, tar la decentralisaziun u tar il dumber d'employadas e d'employads dal chantun. Intgins puncts tutgan tar l'autonomia da las vischnancas (scumond dal consum d'alcohol, uras d'avertura da las fatschentas), entant che auters resultan da debattas politicas (taglia da baselgia per interpresas, monopols chantunals). Tenor il studi scientific "Mesiraziun da la qualidad da la legislaziun en il chantun Grischun" dal zercladur 2015 è noss chantun – en cumparegliaziun cun il rest da la Svizra – restrictiv en connex cun il relasch e cun la midada da leschas e d'ordinaziuns. El ha relativamain paucas regulaziuns, ed er areguard l'activitad regulatorica è el sut la media dals chantuns svizzers. Quest success sa basa sin ina cultura da legislaziun che vegn sviluppada dapi blers onns cun agid d'instruments per garantir la qualidad e ch'è caracterisada da retegnientscha e d'autorestricziun.

Tar las dumondas 2 e 3: Qua vegni renvià als instruments menziunads qua survant. La regenza vegn a procurar vinavant che la concepziun e la realisaziun da las disposiziuns legalas sajan favuraivlas per l'economia.

Tar la dumonda 4: I dat differentas pussaivladads per franar regulaziuns (cf. rapport dal cussegl federal per ademplir il postulat Caroni, 15.3421). L'evaluaziun da talas pussaivladads, er da "one-in-one-out" (OIOO), è fitg complexa, dovra bler temp e chaschuna gronds custs. La regenza applitgescha in sistem simpel ed efficaci che duai vegnir mantegnì consequentamain. En il rom da l'execuziun da dretg federal datti dentant clers cunfins. Sin fundament dal rapport menziunà na poi er betg vegnir ditg, schebain il chantun cuntanschess las finamiras cun OIOO. En quai che pertutga la confederaziun avess OIOO bain in tschert effect, ma ils effects secundars u ils privels fissan considerabels.



En num da la Regenza

Il president:

Il chancelier:

Dr. Jon Domenic Parolini

Daniel Spadin